

Biblioteca como un medio pa integracion cultural

Skirbi pa Yorleny Oduber-Quesada

Bintidos aña pasa, ora cu m'a yega Aruba, m'a dicidi pa busca un manera pa integra mi mes den e comunidad, siña Papiamento y conoce mas di e cultura y di e isla.

E tiki cu mi tabata conoce no tabata suficiente. Enigra pa otro pais cu 30 aña no ta algo facil y sobretodo ora cu esaki ta implica siña otro idioma y adapta na otro custumber.



Un institucion cu a habri e portanan pa mi tabata Biblioteca Nacional di Aruba. Como Comunicador Social, cu no tabata sa unda pa bay profesionalmente, m'a pensa cu tabata algo interesante pa ofrece mi mes como boluntario y pocopoco siña di e literatura na Papiamento y di e autornan arubiano.

Asina m'a cuminsa colabora den e construccion di e base di datonan di autornan local (e automatisacion tabata den su apogeo).

Pa mi tabata algo hopi importante por a siña den e manera aki, integra mi mes den e comunidad y siña mas di e idioma.

Algun luna despues, e oportunidad a presenta pa traha como Periodista na DIARIO. E parti ey ta otro cu ya ta acumula casi 21 aña trahando como Editor Ehecutivo.

Recientemente, m'a haya e honor pa entrevista Señora Astrid Britten, cu fo'i 2003 ta ocupa e funcion di directora, y haci un repaso di e 75 añanan cu Biblioteca ta celebra awe.

Personalmente ta yena mi di emocion por haci un repaso



cortico di e 75 añanan di un institucion asina importante pa nos comunidad y pa por public'é den idioma Papiamento, den Matutino DIARIO, 20 aña despues.

Masha Pabien Biblioteca Nacional di Aruba cu boso 75 aniversario!